

dasemo lettere a domino Sebastian Pasqualigo proveditor dil lago, et li mandasemo uno colateral, aziò in Gardesana facesseno l'effecto; el qual ne scrive, et manda le letere, come non ha trovà homo vogli andar in armada et per questo molti fuzeno in terre de todeschi.

*De Cival de Friul, di sier Marco Gri-
mani proveditor, di 7 marzo, ricevute a dì 10
dito.* Come li consorti de Tolmin hanno scritto de
qui a loro consorti una letera, la qual manda inclu-
sa, et io li ho fato intender alcun non vadino a la
dita dieta, se prima non ha risposta da la Signoria
nostra; et par siano gionte lettere a Goritia zerca
scuoder la imposition, et conclusa la dieta aviserà
il tutto. La lettera da Tulmin de Zorzi Stampa ca-
pitano de Tulmin, di 4, scrive a li diti consorti,
come ha hauto lettere dal vicecapitano de Goritia
che tutti debano comparire a la dieta che se farà
el primo luni poi *letare*, che sarà a dì 10 Marzo,
a Goricia, però ditti consorti de Tolmin debbano
andare.

*Di sier Piero Orio, date a l'abazia di Mo-
zo, a dì 6 marzo, ricevute a dì 10 dito.* Come
el venire partì da Venexia, el sabato fo a Udene
et la domeniga parlò al clarissimo locotenente, poi
el luni vene in Gemona, per veder el bosco nomi-
nato Vasinis per mezo Osoff, lontano de qui mia 7
in 8, in asesa assai. Andai fino al Mozo a piedi, nel
loco più alto erano di belli fagi, ma la neve alta 4
spane, sichè niente putì far, et saranno boni per que-
sto avosto. In Gemona per Piero Baron ho ricordato
dito bosco, et heri veni qui a l'abazia de Mozo mal
alozato, et andai con homeni 40 in uno bosco de
sopra questa abazia mia 6 in asesa grandissima ma
comodo al carozar, perchè la strada va fino per
mezo el bosco, et la farò in alcuni lochi conzar, et ho
fato gitar a terra remi 1500 che sarà per 10 galle,
et saranno pianeri et postozzi di passa 6 $\frac{1}{2}$ l'uno,
questi sono el forzo trezichi, et dicono questi remeri
è con mi ch'è mior de la sorte de Histria. Tutto
hozi sono stato in bosco con un piè de neve, et
oltra el gitar in terra, ne farò da 50 in suso sfessi
et boladi, li principii sono difficili *maxime* havendo
a far con homeni gregi, et farò in queste montagne
50 boni maestri che conoscerano la sorte dil legno
et li sfenderano con la manara; non si ha gità le-
gno in terra che non se fazi 10 remi in suso. Que-
sto bosco non ho voluto se geti più per esser zo-
veni l'arbori, l'è vero che questi costerano assai
per haver tolto li homeni a giornata, a chi 16, a
chi 18, a chi 20 soldi al zorno; el bosco è lontano

dal ponte di Mozo mia 7 in desesa, dove è una aqua
se domanda la Felta che se liga zatre piccole sopra
le qual se meterà li remi et se coudurano in Taia-
mento lontano de qui mia 4, et poi se legerano li
in maior zatre, et andarano zoso fino a la Tisana;
et cussi come se farà li farò carozar et inzatrar et
manderò de longo, et bisogneria quei zentilhomeni
da chà Vendramin metesseno do homeni pratici a
Latisana, et da 500 in suso che zonzino, avisi a lo
Arsenal aziò li mandi li burchi per cargarli, non se
pol butar in stampa. El tempo è corto dovendo
star fuori se non 2 mexi, ho fato le spexe dil mio,
venere andarò soto Tolmezo per far butar a terra
altri remi per 10 over 15 galle in ogni bosco. De
qui è neve, et se lassa in piedi molti belli legni per
esser agiazati, che se se bateseno a terra andariano
in mille pezi. Ogni dì io vado a manzar con li bo-
schieri, et sempre me costa.

*Del dito, di 7, date a dita Bazia, ricevute
a dì 10 dito.* Hozi penetrando per entro ho tro-
vato uno valon che taieremo remi, oltre li 1500, da
remi 2500 et de più beleza di primi. Spero in
questo bosco fornir el total bisogno. Ve dirò *etiam*
ogni loco de la Cargna è venuto pioza et siroco, et
con homeni 50 continuerò l'opera et farò far ca-
soni nel bosco, aziò li homeni non stagi ne l'andar
et tornar mia 12.

*Da Constantinopoli, di sier Piero Zen ora-
tor et vicebailo, date in Pera, a dì 30 zener.*
Come a dì 15 scrisse: che da poi son stato con el
deferder Scander Celebi per haver el comanda-
mento al bassà per haver li salnitri in Alexandria,
disse voleva prima parlar al bassà, et li comanda-
menti de Aleppo, Tripoli et Baruti ha otenuiti, et
mandato quel in Aleppo perchè li zudei volevano
esser sanseri et meter li dragomani. Il Signor scrive
li zudei siano batalati, nè se impazino più in san-
sarie nè in meter li dragomani et le mercadantie
de nostri stiano in li justa el solito, et
siano stimate al solito; et quanto a li mercadanti
nostri debitori, spera conzar la cosa; che le zoie de
queli zentilhomeni Prioli et Venier è venute de qui
et mori li è venuti driedo, ho parlato con dito de-
ferder, el disse, per la gran fede havemo in ti, te
daremo le zoie, et questi musulmani hanno hauto
sententie siano antiani, pur farò etc., ma credo
non starano saldi. Et uno chiozoto zovene de anni
20, venuto de qui, qual fu preso da le fuste de
Obrovaz sopra una marziliania de Mathio de Belemi
et a Pescara di l'Abruzzo presa, et condotto la roba
di Fantoni corfuato asasinato e morto con uno suo